

四庫全書

集部

欽定四庫全書

東塘集卷四

宋 袁說友 撰

七言律詩

元日立春

春入簾幃線幾添
更隨桃荊快新瞻
曉看密密輕絲墮
晚作纖纖細雨兼
可喜田家餘穀粟
也應澤國飽魚鹽
年豐更樂弦歌化
知是曹裝漸趣嚴

令尹以今夏受代

元日得雨

知時膏澤下新正便覺欣欣物意生
細雨寒梢半簷滴
單床孤夢五更聲
兩年元日嗟萍梗
萬里殊鄉付酒觥
不似斗杓容易轉
只今迎歲指東城

惜春

不緣雨雪不緣風
九十風光半已窮
嫋娜熟眠楊柳綠
天嬈濃醉海棠紅
客懷不直韶光好
詩興猶因景物雄
投分東君未應薄
乞花償酒強相逢

梨花

東風日日點征衣野闊林疎四望奇景物賸供行客眼
梨花更索老夫詩登山趁得春三月帶月猶看雪一枝
七日崎嶇三百里倡條冶葉故相隨

和楊誠齋春雨韻

十年此袂與君分一笑樓頭日過晨真箇愁來真似夢
不因詩到不知春雲霄元似非關我風雨何須故惱人
猶得吟邊慰懷抱絕知膏馥乞諸鄰

早行遇雨

約得東風二月春，稍陪孤櫂曉溪行。
酒能寬我三更夢，雨不饒人半日程。
愁對梅殘初話別，懶看桃艷欲欣榮。
紅塵未踏心先退，不是宵長故獨醒。

四月雨應禱

夜半溶溶四面遮，雲峯推起阿香車。
只今隴上誇多麥，誰為丘中賦有麻。
喜見綠針初刺水，笑渠青笠趁燒畬。
偶然精禱誠非昧，應有歡娛田舍家。

趙再可邦君六月雨應禱

長夏何堪日日晴德音優渥遍羣氓黃堂少試為霖手
赤地今傳喜雨聲誠意自知關善政天心正不遠人情
四郊已報田家語一飽應無百計營

禱雨於保福寺是日大雨至

常暘為虐勢流金稽首長松幸屈臨一佛等慈清苦海
衆生度厄浴甘霖沛然而下期中熟可以無饑免大侵
好雨憐人愁抱釋退思疇昔尚熏心

和趙成子提幹喜雨韻

一天膏澤下民區此意拳拳敢自居欲寫吳歌誇歲好
苦無傑語愧才虛稍留佳客聯珠履共酌餘觴笑麴車

試問蘇州兩年熟豈無名筆作

去聲農書

十年三已冒為州每每於民有旱憂午聽雷聲鳴屋角
晚驚雨脚壓雲頭及時三日為霖好為汝千箱樂歲求
欲辦一椽名喜雨愧無老筆贊宸旒

和子西喜雨

戰龍捲水動詩兵著語才非喜雨亭但得雲旂香顯顯

不愁霜髮短星星秧針刺水輕浮綠麥浪翻風半挾青
只願年年飽憂國庶幾萬里一心寧

鄂渚得雨

江頭一夜水鳴舷江外歡聲百萬家已報主人詩滿袖
更誇使者雨隨車支離田父烟蓑濕辟易炎官火傘斜
一望阿瞞狼狽地村村刺水透針芽

連雨

一月長晴窘漕渠更留殘暑要驅除飄風也解終朝久

驟雨新添二尺餘，但覺天公真有意。不知民力已潛紆，
田家是處均膏澤。兩岸歡吟使者車。

大風雷雨

雷風一息到山西，歌側村花不自持。際晚甘霖如倒峽，
今年香雪可翻匙。綠秧蘸脚元非堰，白水齊腰不恨遲。
浪說隨車誇故事，但知憂國願無饑。

中秋無月

皓魄埋雲未肯收，佳娥寂寞為誰羞。可憐數點不多雨，

誤却一輪無限秋急掃妖氛天外去莫教微影暗中流
終當永夜清如水我為停杯更倚樓

海棠

江行了不按春光江路欣看得海棠淺蘸深紅叢蓓蕾
細開濃白巧梳粧蜀花但鬪臘脂濕荆種新傳膩粉香
行客紛紛正寥落為渠著語快飛觴

江行得水仙花

徹底清姿秀可餐柔枝不怯膽瓶寒三星細滴黃金盞

六出分成白玉盤是物合陪僊子供何人遣傍客舟看
山礬似俗梅偏瘦別與詩人較二難

和施德遠雙蓮韻二首

老向塵埃度歲華不堪才拙負州家天公著意成豐歲
地產無心出異葩亂翠綃中雙暈臉抹青山外兩凝霞
何人欲採蓮歸去我有輕舟試一拏

政拙才疎祇具員也應和氣到吳邊鄉來偶爾雙歧麥
今復申之並蒂蓮頗覺園丁驚創見正須騷客賦新聯

天休要是傳消息得得裝成大冇年

迓金國聘使舟中逢玉簪花

扁舟伊軋亂秋聲花下新涼暑不侵濃葉襯成螺展髻
芳苞拆盡玉垂簷誰將茉莉評高下未必清香較淺深
把酒問花花不語微吟空伴小蛩吟

新繁縣麥秀兩歧

豐碑喜瑞熟摩挲後至深慚拙政多魯國不聞三月治
漁陽敢說兩歧歌年豐今日魚旗夢農兆前村鸛鵲窠

又見東阡西陌雨倚樓遙望濕輕蓑

麥秀三岐

用過其才愧弗宜但於牧養要張施未應拙政才兼月
森出來牟過兩岐長短異形垂美穗青黃間色識新枝
懸知瑞應由明主自是豐年屬聖時

午晴觀孔雀

異雀逢人正美觀一鳴晴日傍欄干昂頭未展雲霄翼
掉尾先搖錦繡盤危坐我方詩興切薄寒誰伴酒腸寬

世間最是羈懷惡，猶得亭花著意看。

沿溪轉山入野亭小飲甚適

惜此青青一日春，愛閒因得兩三人。
放身度密窮山崦，隨意居寬趁水濱。
逸飲不成愁淡薄，苦吟終是喜清新。
物華時世相流轉，今古之間幾害塵。

過霞山小飲

霞山書院醉焚香，細雨輕陰見海棠。
春動舊懷杯酒後，晚吹新恨笛聲長。
或紅或白花饒笑，為整為斜草更芳。

寄語風光易塵土相看流轉且相羊

張守招飲

是日王勉夫到明
日嚴文柄之吳中

春風吹作萬家春誰得聯鑣從使君
微徑問花同載酒深堂剪燭細論文
王郎把臂簪仍盍嚴老呼舟首又分
安得雲龍隨上下佳辰不復歎離羣

余應卿招飲

東門郭外七桐裏知有宣州別駕家
再世從遊心自喜暫時觴咏語無諱
平田寒日行孤鶩枯木淒風集亂鴉

酒聖詩狂休問我淋漓顛倒任橫斜

陳主管招飲

時納婦

鵲拳庭竹語頻頻忽有書來寂寞濱盛事許同花燭夜
芳辰仍醉綺羅春璧聯香閣初鳴鳳霞泛仙觴定脯麟
更辦歸裝攜珠玉一時人物各詩人

霞山葉學諭家梅下飲二首

歲闌何地看梅花霜日新晴晚更嘉古觀去尋寒士屋
山園來近舊人家香傳細密聞仍久影倒高深落又斜

同是溪南閒澹者暫時相賞醉無譁

不待梅梢三兩花任他酒薄漫敲嘉恍然靈運穿林屐
妙矣王維入畫家靜聽啞雞唱曉明分疎落鴈行斜
醉吟却是尋芳客借取殘冬一笑譁

同子隆次公小飲

老境昏昏只醉眠不知門外艷陽天奚為有客攜壺至
又以閒人到酒邊山路試登桃映日溪城一望草如煙
春分花事今多少未覺心情勝去年

送彭世昌山臺小飲

象山只在水西頭雲木猶高瀑更流往事何能話師友
時情徒與惜交遊東風又綠溪邊草明月還歸天際舟
白髮蒼顏吾亦老一尊臺上洗春愁

登第一山

極目俄登最上巖秋風衰草塞雲閒漫游江浙幾千里
今識東南第一山志士逢時寧恨晚壯懷有淚不須潛
興亡自古知多少天道何曾不好還

和南伯山行韻二首

日日登山復下山，崎嶇分寸絕難攀。
已無魚腹江湖慮，肯怯羊腸道路彎。
滿目詩材供客子，一杯醪醕染衰顏。
四方弧矢男兒事，捫盡參墟莫畏艱。

千峰踏盡又層坡，冠染征塵不暇揩。
我佳處賞心惟酒爾，愁時引睡奈詩何。
憩亭尚遠日先暮，脚力已窮山更多。
白髮對山聊自醉，如公自富郢中歌。

遊金焦二山至汲江亭用前韻

江山萬里憶徐州十月迎風度小舟極目不知天外景
亂雲遙接水中丘此身五十昔未到著語再三今可酬
欲把邊塵聊一洗只今更吸大江流

過揚州平山堂邂逅許深父主漕

平生踪跡半江湖歲晚淮鄉識舊都小却車塵行復止
要看山色有還無關山回首嗟何限風景於人豈不殊
猶得故人談世事金城方略政堪圖

泊姑蘇館

衝風挾雨到蘇州贏得檣烏半日留豈是甘棠無剪伐
浪持使節幾經由羣觀底事多耆老一笑猶能認故侯
回首齊雲舊游處西山端欲送行舟

遊滄浪亭

出門猶未識滄浪勝日能銷一詠觴綠障千巖森羽戟
翠綃十頃馳池塘清談杖履窮幽徑歸路籃輿帶夕陽
豈是此纓無地濯可憐長說簿書忙

和應憲使遊滄浪亭韻

使星兩兩照前山
筆下高吟萬選錢
絕景政須終日款
茲游真可以詩傳
深林遇雨排清晝
晚日迎風浸碧煙
千載不渾亭下水
俯欄猶得繼前賢

和韓侂滄浪亭韻

平生公賞最巖居
肯作癡兒失故吾
正爾不堪塵滿面
為君何惜酒隨車
十年夜隔青藜杖
僕去館已十餘年
一日身游碧玉壺
莫道欲歸歸未得
買山作計定何如

春日懷錢塘西湖

只今春色滿皇州料得西湖已縱游出郭競聯城下騎
循隄同上柳邊舟恨無兩翼從渠去曾有諸公念我不
到底長安風物外遠方何敢詫遨頭

和董顯之留西湖韻

開門喜得故人音訪我浮生一旅亭老大區區驚歲月
功名落落負簪纓有誰知己頭空白舉世如君眼獨青
羨子百篇詩在手湖山相望不勝情

和忠父于先生西湖韻

先生擺脫世間緣
老去猶堪十萬錢
氣節向來投匭意
風流今識詠梅篇
飽聞東閣掄材久
未許西湖對客眠
聖主如天懷讜論
只今此席為君前

遊武昌東湖

只說西湖在帝都
武昌新又說東湖
一圍煙浪六十里
幾隊寒鷗千百雛
野木迢迢遮去鴈
漁舟點點映飛烏
如何不作錢塘景
要與江城作畫圖

和趙周錫制幹峽中韻四首

西陵峭壁路初經，但見攬空兩岸青。
天近下連蒼玉嶂，山高傍湧翠雲屏。
劃開龍虎流三峽，勅下雷霆遣六丁。
終日橫風倚江轉，恍疑身世在滄溟。

千仞山頭更有山，一山去後一山還。
林巒有路春回綠，僊洞無人夜啓關。
岫列千屏森葆衛，石藏五色像形顏。
舉頭待向峽中望，見說青天近一斑。

急峽高流日夜東，嵌空怪石浪穿礮。
濤喧灘口波翻雪，雲斷山腰氣吐虹。
幾陣堂堂峯砒砒，一泉滴滴水玲瓏。

我行天下今將半安得名山如此工

絕景都忘峽路長江風時送野花香峯排玉帳腰凝雪
泉溜珠簾乳滴房後日奇山猶續續而今偉觀已堂堂
雄篇曲盡形容妙滿袖珠璣到旅囊

和同年成峽州韻

平生蹤跡鴈門踦投老猶甘萬里馳永尚迷行客夢
曉來新得故人詩秋高萼美念歸處月白江清下水時
此日此身無羽翼輸君先去訪鷓夷

過皂角林

南北城高俯壑深，過帆猝猝倦登臨。
兩山未遠瓜洲渡，十里俄驚皂角林。
坐想英靈猶炯炯，眼看祠廟獨陰陰。
塘村共說興亡處，笑指東河血未沉。

和羅春伯奉常寄題稽山閣韻

公來祇謁自周行，脚踏稽山意遠翔。
疊嶂排雲煙杳靄，半天得月夜淒涼。
無言可狀湖山好，有客來時錦繡張。
底事東吳聲價重，螭頭椽筆冠文場。

遊齊山用唐杜紫微韻

聯鑣出郭疾於飛，好景留人倦式微。
盡日山行惟所適，夕陽堤上詠而歸。
摩挲苔壁嗟前事，徙倚巖亭惜寸暉。
空憶樊川秋影去，為誰重唱縷金衣。

泊沙市

雪浪雲煙日卷舒，去城遠近聚廬居。
千年隄岸圍沙市，十里人煙半竹廬。
荆國平分荆水闊，楚樓遙接楚天餘。
江民日與波神狎，只把濤雷當噓噓。

同莫子章方舟下龜溪

一舸相從下碧瀾
城南百里話更殘
絕知未減在家好
政自不愁行路難
舒望最堪詩眼縱
忘形只覺酒腸寬
歸來頗訝山頭黑
果是西風一夜寒

順風至采石

快哉真得楚王風
鉦鼓喧江四面雄
但欲帆檣催上水
敢辭井路傍西戎
江空歲晚飛煙外
人靜霜明過浪中
少泊山腰羌笛斷
一樽那肯為詩窮

過楚州用霍希文韻

夜入山陽鷓首東單車出郭更匆匆欲知勢扼三江近
政以城高百尺雄此恨終天身未老何人抵掌氣凌空
連雲細草秋風下把酒長吁問化工

被旨往許浦閱兵風雨中舟過梅里

濃雲障日卧前山已覺林深寸步難風雨於人本無意
筋骸如我不禁寒小窻飽聽喧江浪蕭寺時驚落岸灘
慨念興亡千古事夜闌相對說江干

銅鐵堆

過峽江銅鐵堆由是分荆蜀界

千峯挿碧繞江面兩石中分銅鐵堆
東岫附庸方崒嶭西山儼立更崔嵬
懸知造物精神巧幾誤良工斧鑿來
萬里西舟今蜀境安流到此莫辭杯

自常熟敲冰行舟半日一夜僅十里

到曉纔通十里冰頗憐黃帽歎征行
半篙不下風霜夜一日之間水陸程
無復穩時村路滑不勝危處斷橋傾

驅馳原隰皇華事筋力猶堪誓此生

周錫自蜀歸浙

東甌西浙兩黃緣齊止金陵萬里船風月醉中同客夢
簿書叢裏讀詩篇懷歸念我方投劾勇去輸君已著鞭
歲晚江空颿力滿長安春好正朝天

送葉表姪歸鄉

枌榆離別幾春秋作計吳中祇謬悠回首故園三歎息
喜公歸路兩經由懷鄉誰不思邱首游宦余方愧督郵

千里相忘未歸去家山時向夢中求

新河

楚州舊有磨盤河謂紆曲也乾道間濬而直
之目曰新河

路轉風回四面歌新河磨盡磨盤河一川漲碧分灘遠
萬柳排青夾岸多此日經行空歎息當年功績未鐫磨
客遊為愛瀟湘楚五日之間一再過

荊州道中

砒砢奇峯繞復環
淼茫大水枕前灣
望迷荆楚山川外
浮遍乾坤日夜間
舉酒欲吞雲夢去
倚樓無復利名干
霧船風纜經多少
老盡行人只此山

觀潮

倏見江頭萬鼓催
更聞脚底一聲雷
怒濤直欲浮天去
急浪猶能帶雨來
豈但皇都誇偉觀
要令區宇絕纖埃
靈胥勇志嗟何在
共弔江山付此杯

閘柱

唐建洪澤開舊基猶存兩柱柱經丈餘傳疑
云柱有靈凡舟過而誤觸之者能作孽

三丈圍寬兩木靈千年開骨狀如城揚颿欲過心先動
擊柱纔聞念已驚東越梅梁猶逞異南城老樹也為精
昔聞求福木居士今向枯株免禍成

宿鄰水縣

酒餘孤館夢初回漸覺茅簷浙浙來夜半山前風薦雨
曉來崖底澗鳴雷騰添崗翠三分色呈出秧針一寸栽

恰得烏雲天外少，鶯花無數惱人懷。

紹興府學齋宿

從容黌舍日西流，淺飲猶看夜氣浮。
小款話時殊淡薄，細論文處轉清幽。
諸公學業方加銳，一戰功名要早收。
我了齋祠便歸賦，故園已作夢中游。

釋奠齋宿

雲高天白夜沉沉，墻外誰家送遠砧。
有月林梢鳴翠羽，無風窻下落黃金。
百年已老安仁鬢，三徑空懷靖節心。

病眼細書何齟齬短檠猶得對孤斟

和薛公叔留都城韻

年來更覺一身難却掃應須早閉關
老矣壯懷空歲月歸歟活計只溪山
未堪鷓鴣化搖而上肯類蠅營去復還
白壁深藏有餘地區區何必苦躋攀

和劉叔驥司戶韻

不飲無何一味羶聽渠七字輒欣然
念非公子誰堪比可奈吾衰不待年
料得詩魔排錦繡却從筆力累山川

蘭亭若未歸修禊更伴劉郎發祕傳

聞劉將歸山陰也

和潘德久韻

曾讀桐江路上題斯文便合請君司向來吳會連朝語
晚歲揚州七字詩憂世自憐聞道晚論心猶恨結交遲
帆檣百里孤吟罷坐愛雄風約雨師

和陸成父韻

功名落落愧強年晚到淮鄉意惘然問月高歌聊自適
吟秋苦思替渠憐據鞍剝欲誇馳駿釀酒猶堪醉擊鮮

坐對晴雲淨如拭水光秋色正連天

和兼善韻

江湖蹤跡厭萍游只有詩魔老未休
平日故人談語句暮年裏眼識風流
自能作意閒中趣無復關心世外愁
趁此百年身偶健為君一語竟須酬

和惠國博韻

平生心賞有高蹤更喜夤緣造化中
語次欲傳須柳子詩宗不愧是江翁
無言可究稱醇德有眼能看拜下風

共覩謝庭蘭玉秀只今攀桂廣寒宮

用吳知立韻

老去曾中句甚豪清風應笑我徒勞可憐官事何時了
肯使詩盟取次逃荆欲論文思擊節不妨飲德要投醪
如君豈是長貧者自古詩成得繡袍

呈浙西張提倉

張為鄱陽教官去已數月僕來
為法曹曾見於此嘗問訊所學

老掾當年意已傾執鞭雖晚眼仍青繡衣公子初雲漢
璧水先生尚典刑負弩前驅容漫叟下帷覃思媿玄經

催科欲付翻羹手照我山行定幾星

入山呈孫使君

平生懶慢豈能剛身外微官似漫郎不怪閒居為消渴

何勞多酌本醒狂

僕早衰多病畏人懶出每
從使君飲輒不勝杯酌

雪晴欲試

穿雲履背冷仍尋曝日牀為想騎牛破山碧晚風吹笛
野梅香

簡唐英同年四首

春風已落百花中鏡裏空嗟兩鬢蓬病懶未能禁酒困

多愁元不為詩窮偶然貞曜生同世尤喜丁寬易未東
聚散由來皆造化一篇我欲謝天公

早起孤舟掀浪中自憐老大要飄蓬風前索酒輕寒殺
夢裏尋詩始意窮帆飽急隨山脚去櫓回強趁水頭東
明朝已作掃門計未必堂堂舍蓋公

書生懷贄大門中一見歸來話小蓬坐喜情文渾不薄
退嗟吾道豈憂窮更將儒術重熙載要使君心亦欲東
若也銘勲在彞鼎古今何止一周公

舊言山色有無中今日環觀在短蓬遊子不堪歸路冷
篙師愁殺裏囊窮便回溪口風尤急欲到山頭月已東
贏得閒言擾詩社煩君更語主人公

丁端叔茶馬會同年同庚

竹林賓主樂襟期並榜齊年兩見之丙午同生雖共老
甲辰笑我獨為雌秋鴻社燕時難值桂酒椒漿醉莫辭
半是天涯老行客者英當繼洛中詩

登蓬萊閣

癡兒官事苦相臨，每到蓬萊慰賞心。
一水縈湖連海去，片雲帶雨入山深。
自憐老客從渠晚，喜有詩翁到此尋。
中外升沉政懸絕，強抽荒思續高吟。

饋春茶于制司屬官

戊午新芽上蜀江，表情未有敢先嘗。
幾年爭鬪無雙品，萬里書來第一綱。
水截龍章浮碾玉，爐煎蟹眼試憑湯。
知君文字五千卷，正欲冥搜錦繡腸。

求酒於邵元實刪定

骨相酸寒不足論平生心賞舊家村七年誤索長安米
百病幾成楚客魂命薄不堪嗟分定官閒猶得荷君恩
秋風一醉餘疴殄須乞莊生五石樽

乞酒於林子長通判

衰顏得酒尚能頰笑我維壘恥弗盈無計青州幾從事
可憐白面一書生新筭競說鄰家熟好句慚無健筆成
傳語白衣人記取何須秋帽始關情

謝誠齋惠酒

褰裳樂得送迎翁
遣句猶煩七字工
頗識當年斤斧手
却慚昔日馬牛風
平生楊敬惟稱項
晚歲侯芭只守雄
便把黃封紅客眼
一尊已當百壺豐

饋蝦腊彎魚乾於端叔

東西萬里苦相望
海物時來自故鄉
兩眼尚能驅水族

水母得蝦方能行

一彎猶解說丁香

一名彎魚

莫孤念遠勤將意且

欲均甘未敢嘗
有詔知君便歸去
古人驛寄願頻將

和沈德遠寄江鯨韻

粉身截玉慰渠貪浪迹泥塗遽著籃坐缺江生嗟不樂
詩來東老謝分甘世間風味鄞江頰傳裏形容太史談
欲報瓊瑤無一可移文空到北山南

橄欖來自嘉州

筠籠相逐到天涯喜見森森色正佳尚想紅鹽落青子
未誇黃蜜挂蒼崖眼中鄉味催歸夢足下登音慰遠懷
稍待酒殘回齒頰餘甘猶足助談諧

岳大用寺簿惠佩刀

文陣談鋒不可當，小恢游及向朝行。
一夫敵爾嗟長劔，十九人中見穎囊。
徐子身非逢季札，呂虔心已識王祥。
善刀我亦知藏去，他日猶煩賜尚方。

謝梁飭父通判登樓賞雪之約

龍蔥天闊曉光浮，滿地斜飛玉作球。
好趁陽春歌白雪，政須從事謁青州。
打門報我樽前約，乘興須君剡上遊。
清絕有人誇盛事，貳車攜客醉南樓。

和程閣學觀雪韻

入竹投窻細細添
兩山瓊玉稱遐瞻
巧於夜半將新歲
每以風回蹴上簾
寒雀棲枝驚落屑
鷓鴣鳴食訝堆鹽
正須度臘成三白
已覺西風勢轉嚴

和梁曹池陽道中遇雪韻

癡兒汨汨尚尋梅
點檢花梢次第開
客裏相逢秋日好
雪中重喜故人來
歲寒過我留佳句
夜半論文酌此杯
毋疾其驅行有詔
江頭準擬送君回

臘雪二首

歲事無多臘近殘
謝渠飛屑破天慳
禱祠空愧兼旬力
造物惟消一夜間
是則化工端有意
要於官政亦相關
雪催詩後詩催雪
更欲堆鹽滿四山

無計遮留歲月殘
頗驚節物愧才慳
可人臘雪偏宜處
屈指春風未到間
猶得微吟供午枕
不須高卧閉晨關
晚來碎玉零珠後
已老蘇州一半山

喜雪

玉龍方急戰寒聲
滿陣江風雪作茵
準擬豐年須造物

編排佳境付詩人莫辭樽酒偏勞勸更喜江梅欲鬪新
愧我為州無善狀楊花何事已先春

誠齋指簷頭雪為詩材二首


春風著意向春宵巧作冰澌細細飄正好千門競燈火
故添萬瓦燦瓊瑤誰憐梅蕊猶含玉大遣楊花為奪標
一段風光付詩手物華正恐為君撩

使旌獵獵晝連宵騰說吟邊湧思飄曉枕已哦千樹雪
夜船更踏一溪瑤誰將春霰天然巧來伴寒梅別樣標

贏得袁家僵卧者開門今為好詩撩

立春日雪

料理風光興未殘老無詩手一何慳
新傳綵勝排枝上趁得冰花落鬢間
噪雀曉來埋屋角土牛聲已動譙關
寒窻我欲觴眉壽不是羊羔醉玉山



東塘集卷四

欽定四庫全書

集部

東塘集卷五

六

詳校官石中允臣薩敏

主事臣呂雲棟覆勘

騰錄監生臣任

溥

騰錄監生臣黃

鐘

欽定四庫全書

東塘集卷五

宋 袁說友 撰

七言律詩

恭和御製賜進士詩韻二首

雲漢昭回下建章，鸞翔鳳翥燦龍光。
宸奎錯落皆謨訓，聖語丁寧示抑揚。
自古求言開數路，只今兼聽極羣方。
一篇默寓憂勤意，正為成王不敢康。

堯言不數漢文章，漫說唐人萬丈光。
百辟共知尊上指

羣儒何止戴言揚
絲綸甫幸來中禁
琬琰俄欣奏上方
京邑小臣觀盛事
願輸忠悃贊明康

車駕過重華宮和陳止齋韻

曉到觚稜簇仗齊
千官星拱馬無嘶
清塵警蹕來宮闕
夾道歡聲浹耄倪
孝治未應誇鄭隧
皇威今已竦邊聲
小臣何以揚君德
手舞相呼醉月溪

擬詠展觀太上皇帝御書

龍顏祇肅閱堯章
寶軸神毫赫有光
八法心傳齊帝學

萬年奎畫與天長
龍藏肯比唐三傑
墨妙尤卑晉二王
舜治方隆定于一
區區發問陋梁襄

擬詠宴羣臣

宴錫蓬山煥舊章
羣工列席侍龍光
加邊折俎君恩重
合奏迴風韻語長
擊筑為歌唾漢祖
舉觴隆禮視周王
幸哉盛事今逢見
願赴功名敢入襄

端叔奉詔還朝二首

清樽連日話辛酸
正為中年作別難
二十年間嗟契闊

八千里外得團纒湖山覺夢俱萍迹風月題詩徧錦官
一舸輸君已僂去微吟空抱屈平嘆

萬目環觀一節東江酣遲日漾春風君王恨見嚴徐晚
廊廟方資稷契忠四蜀正須煩筆下一言知已定胸中
少焉我欲歸田去拭目期君鼎鼎功

閱兵給賚

小臣銜命入雲屯聖主如天詔語溫萬甲衝風隆士氣
一言挾纊荷君恩頗驚霹靂燒殘壘更想蒙衝上海門

欲挽長江問豪傑豈無擊楫歎中原

盧德華郎中將漕福建

疇昔相從在帝關更于歲晚接清班同朝所恨常疎闊
一歲之中幾往還便合橫翔來楚路未應清夢落閩山
誰將好雪留征櫂母疾其驅有詔頒

和虞仲房潼川運使韻

西湖樽俎憶風流今日檣烏過我州萬里相忘嗟又別
九華何惜更同游中郎有字新鐫石小子無言只點頭

及此公餘多暇日為君作計且邀留

求公為書池陽觀德亭記

再賦

飄然擊檝問中流仗節觀風十四州見說九重天語好
不妨萬里蜀山游大書競照光山色好句應題濫瀨頭
稍辨澄清早歸去周南寧復嘆淹留

和閻丘資深轉運判官送張同年韻

造門剝啄笑談餘過我頻迂長者車八詠繼吳推翰長
一封諭蜀屬相如岷峨詩富追風雅韶護聲諧復古初

仰止騷壇方北面不堪官事蠹書魚

和浦勉道轉運判官巡行出關韻

濤雷殷晝候前驅駟馬橋邊使者車
風約江聲喧笑語山迎雨脚傍閭閻
城頭北海傾樽後馬耳西風攬轡初
關外秋來聞小熟更將餘瘵入呵噓

和許深父轉運判官韻二首

我輩難忘故舊情為君滿意說詩清
拋磚不愧塵埃想剖蚌俄驚的皜明
宦路幾年嗟契闊長安累月話平生

詩筩却趁郵筩急吟到揚州更袖呈

詩裏論交淡淡情箇中風味不勝清錦囊著句知才盡
山色逢人作意明已覺頭顱侵晚景尚堪風月快餘生
與君握手關心處媿乏琅玕腹可呈

送吳子明知閬州

聖主方勤西顧憂大朝臨遣遴賢侯蘭香昔在潛郎地
符竹今分古閬州蜀道難時雖萬里漢川佳處正三秋
莫嗟身落江湖遠魏闕心存記子牟

送同年曾南仲寺丞知温州

久同朝蹟又同年更送旌麾過海邊
多士向來親戴席斯民今幸得蘇天
潛心閣上書千卷鴈蕩山中草一川
小待公餘尋舊迹便歸玉笋聽鳴鞭

送樓攻愧知婺州二首

壯年才氣壓詞場衆已相期白玉堂
垣制孰非經大手斯文無復數他楊
諸公政爾需調鼎一語翻然忽抗章
汲黯固知當大用得君徒欲重淮陽

三十年間企絕塵久同朝蹟話平生論文密處雖朋友
投分深時即弟兄自恨我無分袂語但輸君已著鞭行
東陽一葦杭之便毋惜公餘蚤寄聲

日華書自通州來言其同僚多唱酬

題輿贏得錦囊歸
酬唱西崑事可追
久不陪君三日語
政須燕子百篇詩
寧甘吐吐癡兒事
稍愧紛紛俗吏為
我亦湖山多暇日
秋蟬時解噪寒枝

餞金使出北關風雨大作

出郭初行十里賒狂風急雨鬧田家香杭飽熟雲翻浪
蕎麥新開雪作花淺水半村環野趣好山一帶接京華
晚來踏盡臨平路風脚全收雨脚斜

次常熟縣先君舊所攝宰也

衝寒一舸下琴川小纜依依市柳邊花縣重來聽好語
棠陰深處不論年釣遊頗憶兒童舊風物徒驚歲月遷
老恐不任奔走力問儂何日賦歸田

守郡不能同憲使倉使游靈巖

秋風敲葉漾湖光
兩兩星華古寺傍
曉日一川迎使節
晚山十里送歸艎
風流我已非山簡
賓客公應念葛彊
豈是清游本無分
紛紛鴈鴛苦相妨

司庾會稽道中答衢民綵幟送行

征車何事不容征
綵旂歌謠塞路津
徒以平生多拙政
偶於歲晚得衢民
我方州縣慚尸祿
汝向閭閻切愛身
料得去思均彼此
一詩聊復慰邦人

過池陽舊治和呂子西韻

浮沈宦海幾春秋
歲晚重來舊典州
昔日青山雖在眼
故俟白髮已盈頭
吟邊感慨關情久
忙裏工夫著意偷
聞說峽江春漲晚
捲帆聊為此邦留

送惠縣丞之官

立之何事屈藍田
隱忍功名古已然
預信鷓鴣只他日
莫嫌鳧鷖尚頻年
征帆夜濕三更雨
去路人欣八月天
話別匆匆毋重惜
一封丹詔下天邊

和魏南伯縣丞韻

著語相過見一斑我慚尺寸強躋攀
羈懷袞袞三江水
去路迢迢萬里山酒盞逢花尋客處
詩筒將月對船間
固應候喜多知己未必詩聲只汗顏

和洪叔晒主簿浮玉亭韻

亭為君來又得名公餘贏取眼雙明
溪光影碎黃金艷
波面聲流白玉瑤夜半吳歌綠底恨
晚來山色不勝情
風光我欲平分破故把吟邊當結盟

肅客借重金紫綬

平生青紫濫於身更冒金章肅使賓何以假為誠豈敢
烏知非有笑無因猿狙自是羞華服鷓鴣姑容接後塵
回首紛紛天下事有時宜假不宜真

成都府學釋奠

西風浙浙露溥溥釋菜雍容禮可觀冠帶三千嚴鵠立
風雲九萬欲鵬搏錦江曾吐曾中鳳泮水新回筆下瀾
拭目諸君快秋捷臚傳高壓萬人看

送呂武仲司戶范純之司法赴南宮試

欣然願作送行詩盛事江邦獨見之
醜酒且同明月醉
驅車未怕朔風吹相逢慙入紅蓮幕
穩去高攀丹桂枝
莫負玉階方寸地為言民力要扶持

送柯伯東省試

道義如君只幾人相從了不見塵侵一樽
但覺論文細
三畫從知得意深自是強年應折桂
不妨朞月早傳音
我今已辦如椽筆擬稱瓊林最後吟

送惠補之昆仲秋試

斑斑蘭玉不勝清
長羨于門久日榮
共慶兩蘇離蜀道
從今二宋到神京
三年刻楮真餘事
一日乘槎定策名
想得頤山來歲好
綠袍黃裏照溪明

送聘儒姪秋試

八月靈槎萬里秋
乘風得雋要遨頭
吾家連已躋儒級
汝業今宜濟巨舟
掘井莫令嗟九仞
善刀終自見金牛
儒冠豈解真相誤
有志應當萬戶侯

送薛公叔秋試

流落相逢雪水濱與君傾蓋即平生湖山十里雙溪畔
賓主三年一日情學海波瀾誇健筆夜窻燈火幾長檠
不堪送客杭州路更聽驚人快一鳴

鹿鳴宴

秋影涵江暇日長銀袍濟濟宴公堂九華佳氣眉間色
千佛高名馬上郎賸數連珠誇瑞應會看僊桂滿枝芳
春風得意歸來好衣錦聯鑣入故鄉

成都府鹿鳴宴

大啟文明會勝流同升更合上西樓三春得意桃花浪
八月乘槎桂子秋結綬偏應登鳳闕挈雲直欲釣鰲頭
乘除但看今年好六八名高五十州

集同年於聚景園

慈恩回首幾番春樽酒相期在帝京人事好乖知歲久
天宮作意得朝晴向來禁籞所未到同此英遊真可榮
無奈斜陽又催去更憑餘酌話平生

餞送蜀進士入奉廷對

蜀才卓犖照賓筵秀出斯文萬選錢聖主龍飛初策士
皇朝春好正朝天丹墀獨對三千字黃甲重魁四十年
歸把羣書觀未見要令學業到純全

宴許成子魏華文二魁吳文伯節判陳表之教
授盧仲修軍資以考西省試同集

書繡歸來自帝京魁星雙照錦官城持衡稱職真能事
勸駕何功亦與榮細與論文重款接要看落筆更縱橫
我歸便作江湖計拭目需君輔太平

同張元善集癸未同年

同年幾合幾分違三十年間見日稀
尊酒相逢今也幸詩書論政舊焉依
慈恩故事嗟回首吳地清談對落暉
平世功臣在公等尚期努力佐龍飛

和薛子晉來慶癸未登第韻二首

雲霧油然託應龍姓名偶徹大明宮
臚傳殿廡千官肅聲到旌旗萬馬雄
黃蝶飛來驚拜命青衫誤著敢言功
如何李邵猶能第造物何心本至公

寒茲也趁百花新眼懶猶貪上國春五技怪能成薄命
一名却喜繼前人喚將好意詩頻賦洗却閒憂酒再巡
底事牛堪有歸序韓公平日最相親

會新第進士和陳振享韻

梧桐風細月將樓猶得公餘款俊游喜入芳樽涼徹夜
風生綺席氣橫秋兩魁前躅高三輔八雋飛觴照一州
屈指吳門多盛事眼看勲業佐宸旒

蜀進士許成子魁天下用其殿前賦詩韻以志

喜

岷峨策足問修程入對明光近太清五十年間多士賦
三千筆下一魁榮斯文焜耀由奎畫是處流傳仰蜀纓
我已黃緣觀盛事更看公等致隆平

送誠齋二首

誰作朝陽一鳳鳴公朝今復歎斯人抗章寧奪三軍帥
去國尤輕一葉身政以青蒲姑夕駐更聞白簡為前陳
只今小試回天力它日擎天看柱臣

長裾端欲曳賓墀人事何乖遽別離未盡胸中懷舊意
又吟江上送行詩公名此去如山重我老誰憐似足踣
憑得征鴻寄消息書來猶記別君時

寄李兼善

湖山昔日記清游百遍相過語未休遠邇漫勞人室念
東西空望淞江流中年別去情尤惡幅紙書來意轉愁
歲晚漸於詩興好待君歸後飽賡酬

祝子正從范使君鍛以詩寄之

柳下嵇郎好在無深居應得靜工夫丹成便許隨雞犬
分定初知養鶴鳧癢處端能窺鳥爪夢中不用斷龍胡
別來亦有閒忙事日向黃家問酒壚

贈應童子

閩山佳氣毓英儒牛角胷中敵萬夫黃石固應傳孺子
玄文真可與童烏飽充器識觀他日莫負聲名滿上都
更憶韓公序文好成人之禮正相須

姚行簡撫幹歸雪川

一見油然慰所望巾車更辱到他鄉相從樂處光陰速
索笑濃時意味長樽酒未堪留好客湖山早已送歸艍
秋來尚憶門前路莫惜溪頭屢買航

和楊誠齋韻謝惠南海集詩三首

斯文宗主賴公歸不使它揚僭等夷四海聲名今大手
萬人辟易幾降旗天方欲治將焉往用不崇朝尚竊遲
整頓乾坤從小試南州昔日洗潢池

公嘗持節廣
中盪平寇盜

玉海書來喜欲狂飡霞食瀝齒牙香固應宗派名江右

底用宮袍入建章今代歐黃真有種向來沈鮑肯同行
只今五集三千首但覺熒煌錦繡張

芸閣登儒拜黼衣鳳凰來泊鳳凰枝待教黃閣調元去
暫對青藜下燭時身到三山真得路君留羣玉幾題詩

館中有羣玉亭

十年前訪岷峨事也作書郎慕左思

某丁酉歲備數館職

胡元邁編呂僊翁傳

工夫未達性中天九轉還丹漫費年至理本無多智巧
此公自有一神僊絕知開卷翁如在剩欲忘言意自傳

功行世間千百億諸天更辨筆如椽

同鄂州都統制司登壓雲亭

一帶城頭四望全壓雲亭上更無邊手攀北斗輕飛肉
目眇南樓僅及肩城郭千年高復下江湖萬里後還先

大江在前
東湖在後

平生頗負昂霄志便欲乘風送上天

張思濟縣尉初舞翠亭

新築成時秋事高滿天風月下岿堯佳名欲奪雙溪景
淡墨須煩六幅綃一簇穿楊誇箭羽幾番伐鼓動溪潮

此亭政合貪山水百里之間患已銷

題廟池上新剏瀛紅舞綃亭

高青遠綠映回塘菡萏蒲細細涼蘸水瀛紅羅襪渡
舞霓綃翠綺襦香瓊珠碎落風前雨蘭櫂夷猶月下觴
老帥如何太風味兩年池上送殘陽

廟南新剏塵外亭

城頭拄頰俯橫塘塵外躋攀四面涼南瀆夜鳴江水瀧
北牕曉浥芰荷香著亭盡得山川景攜客同甘醴盃觴

寄興江村家八九平分我欲卧南陽

和資深同游塵外亭韻

城南絕景半林端
城北荷塘十畝寬
風月無塵頻入座
江山弔古一凭欄
瀛紅淺露嬌啼臉
綃翠輕颺醉倚干
日暮對花吟不足
三翁步屨小橋看

用劉汀洲左顧亭韻

杖屨東風欲濫巾
小舟重泊一亭春
醉看梅月無新語
老與溪山作故人
意氣不驚雙白鬢
功名心負百年身

我來又續題詩柱敬為劉郎細拂塵

用陳和父太博韻題江州高遠亭四首

鮮新棟宇出樓顛盡得江山四面全
高摘星辰風月夜

遠迷河嶽水雲天一湖尚想甘棠愛

又湖名甘棠湖

萬井誰呼

大隱塵見說松關頻却掃兩賢吟處日回旋

亭高未涉意先申五馬同來却報春
一笑孰知今在旅
茲游端不厭居塵分張好景因人重
排抄佳篇逐日新
我是東州西上客也來吟作社中人

卷五
尋陽名郡敢言支最愛江山左右之松蓋前傾渾似故
詩兵捷出愈稱竒案頭朱墨無多事亭面東風足四時
相與平分賸遺愛未饒白傳去時思

久說匡廬喜暫經遐觀但覺眼青青倚欄萬事雙頰鬢
撫掌千年一古亭珠玉名章方競賦江山喜色已先形
我來落筆真如助撩得詩狂不為醒

清暉閣

丁巳
再游

清暉傑閣幾朝昏吟咏曾喧白下門一別朱欄陪綺席

重來青卓接荒村名章尚憶江秋句短此誰招月夜魂
老去情懷更蕭瑟懶從孤館覓清樽

會文堂

東帶峩冠集會文郡侯著語到諸君平居講習須朋友
退食工夫在典墳士學何先先尚志書生務業業惟勤
鷗鵬他日扶搖上共致雲霄慶策勳

善頌堂

庭前雲蓋碧巉巖品堂上先生雪滿髯說藥客來聊下榻

謁齋僧去便垂簾種時法好花難謝買處錢多石易添
子舍光榮身壯健只將香火事華嚴

桂椿堂

攜李于門伯仲佳聲名籍籍到天涯一經早已傳韋氏
五桂今重說竇家滿眼衣冠真盛事幾年棠棣看聯華
蘭臺昌與編青史要使文風萬世誇

白雪堂

今代斯文只此翁乾旋坤轉獨孤忠千年此地江山裏

一日東坡翰墨中莫起黃泉空老淚可憐赤壁幾春風
瀟瀟暮雨雙雙竹白雪堂前忍酌公

知止堂

先生七十已垂車父子俱榮出帝都當世若無知止者
公朝何以勵貪夫升堂展卷人何在訪竹尋梅色尚臞
我老自憐生也後拊編猶得歎前蕪

題韓元吉可止齋

平生我亦愛知休三徑如公最早謀歸意酒釀何切切

宦情紙薄正悠悠書來誨語如親面別後光陰歎轉頭
更為蒼生須一起志功元自合封留

游揚子雲墨池

平隄修栢轉林塘飛蓋同升吐鳳堂後世有傳由準易
斯文無復數他揚草玄大啟天人奧池色猶關翰墨場
弔古懷賢尚遺恨不然晁董可相頡

遂寧府境內火池

澤中有火猶為草焰出方池更異常氣烈羣山酣土赤

陽潛深地液硫黃書生考訂言雖確造化工夫理甚彰
君看輿薪一杯水物因偏勝故為強

過廣安軍王恭父大著墓

與君執友共為郎尚憶松江送客艍在昔清班方袞袞
至今衰草恨茫茫百年名世嗟天喪一日修文在帝傍
雲攢風杉空掛劍不勝老淚灑危岡

謁洪澤鎮龍祠

平生忠孝徹幽冥稽首龍祠鑒此誠自是皇靈頻震疊

也知神力解因成片帆以往無多路百里之間只一程
目斷長淮嗟往事孤哀有淚落邊城

遊江瀆廟用故侯吳龍圖韻

馬嘶楊柳泊林塘六月城南趁曉涼萬古叢祠千木暗
五風十雨一爐香暈飛棟宇新輪奐鼓奏犧牲薦豆觴
努力為民祈福地年豐今已格陰陽

劉德修殿院持節歸蜀

堂堂栢府幾人過屈指精忠竟若何正爾浮雲遮白日

賴公砥柱立頽波回天力挽千鈞重去國身輕一葉多
萬里長江向東去清明無日可鏤磨

過忠州鄧都觀

古栢修篁萬木顛盤山百折叩真僊便疑腳踏如來地
已覺身遊洞府天空翠遐觀浮海日偃雲時汲濯纓泉
我來只恨無僊骨未必丹爐不再燃

和野堂僧子惠韻

與公林下昔閒人別後書來意轉親老去興懷空繾綣

詩來得句愛清新
眼看吳地千峯月
心在苕溪一釣綸
猶得支郎消息好
錦囊時寄筆端春

堅老住廣福

高僧七十未龍鍾
飛錫飄然百里中
正欲逢場施手段
不妨臨老入花叢
把茅便可傳宗旨
一鉢由來是祖風
直要空門高著眼
看渠拍手任西東

飯西湖兜率寺

風爐煮餅梵王家
一日平湖十里賒
遊子政須供杖屨

老僧應有瘡煙霞絕知咳唾新珠玉想見冰霜遶齒牙
我恨三山無路到望中贏得眼昏花

題淨相寺

清詩冷閣更佳名一段家風太瘦生東老懸知有餘樂
西湖今可問前盟年來信覺青山好老去休驚白髮更
欲識箇中無盡意挑包急急看吾行

過懷安軍雲頂寺

拂雲絕頂俯金囚直上重山最上顛一佛嚮來臨大地

萬松今獨近，高天枯楠夭。矯渾生意斷，石盤陀幾合年。
大士重來聞，囑付毫光端。欲掃烽煙。

五言排律

善頌堂

家法傳忠孝，朝英仰正平。抗詞嚴廟制，勇去樂親榮。
一室從新扁，羣公詠落成。清風天籟靜，斜日雪山橫。養志
閑曾重，浮名廣受輕。聞風千載下，凜凜萬夫驚。

和程泰之閣學春雪韻

妬臘三呈白欺春六出花玉層渾欲墮珠霰一何奢巧
態穿庭樹餘寒戀釣槎積難殊未密散易已成賒有客
門間卧何人帳裏遮淺斟羞獨舉低唱敢言譁故壓梅
花信猶先柳絮斜晚漸方歷亂夜櫓正咿啞剩把新年
雪初烹改火茶剪裁歸妙造比興屬詩家應有呵纖手
朝窻學畫鴉

飲寓隱軒

軒亭曉清曠行樂未妨頻無客不堪醉有花長是春憑

欄尚紅藥結伴擅芳辰笑駐凌波步香分折角巾鶯聲
殊自健杏子况嘗新仰止宗英伯來為鄭驛賓言辭獨
樂樂仍命可人人鴻弄舞時影梁蜚歌處塵棋枰誰得
雋詩筆自疑神欹倒何妨屢歌呼却甚真升沈塞上馬
容易鬢如銀奈許追歡地回頭迹便陳

東塘集卷五

欽定四庫全書

東塘集卷六

宋 袁說友 撰

五言絕句

贈相士林石

豈是無仙骨平生百念輕
但存方寸地吾不計前程

題關都官西湖孤山四照閣圖

三賢堂趣遠四照閣詩傳
高節無人繼孤山只儼然

跋本朝六名公帖

道喪嗟耆舊人亡獨簡編家藏六君帖何必萬人傳

六言絕句

十三日飲俞園昌甫斯遠彥章畢至

忽爾嚴冬設鱸更於晴日觀梅人道荒尋邂逅我忻良
集而來

題米元暉太湖圖卷

水際天低岸遠山腰霧捲雲鋪擬喚松江小艇歸來好
趣蓴鱸

題東坡蘇公三笑圖帖

不覺虎溪過却軒渠一笑而歸此笑此心真處自然魚
躍鳶飛

和程泰之閣學汎舟南溪遇雪韻三首

目斷山前浮玉春回雪裏宜城得意扁舟乘興歸來好
語增明

憐我閉門卧雪慚渠有酒盈樽老盡青山曉色愁添白
髮霜根

孤鴈聲悲南浦漁人冷徹歸蓑獨有耐寒瓊玉一枝先
奪陽和

七言絕句

和康叔探梅韻三首

今年人憶去年梅試問今年花已開見說春風正料理
不應小雨便花摧

詩壇傳檄未應虛忍負東君自作疎急急花前巖下看
橫斜清淺兩何如

尋梅著語樂清閒已覺孤山氣象還未辦輕舟行百里
也須踏脚法華山

題石上玉簪花

欲訪招提倦不禁空懷落落海潮音如今不作維摩病
猶記年時賦玉簪

翠鈿瓊葩別樣芳涼風微雨淡梳粧姮娥夜半朝天闕
應有遺簪墜帝旁

和范石湖詠雙蓮三首

江妃瑟裏恨沈沈萬點紅邊意轉深擁出三千歌舞罷
翠綃縈得兩同心

天泉池上舞晴暉一別人家未肯歸千載却隨湘女泣
風前時學鳳凰飛

鑑湖一曲記蓬萊擢入紅蕖挽不回今日池光少公事
好懷聊復為渠開

題尤提舉惠雙蓮二首

十年蹤跡落修門賸憶西湖菡萏風今日江城秋浦上

舞綃依約舊相逢

六月炎歊苦盛長一枝遣伴北窓涼此花便合雄文記
擬為君書瑞應堂

致菊種於子長

好花一歲幾回開喜見東籬舊信來不惜移根到鄰里
離披也入畫堂栽

致盆梔子於同年樓大防天官

一輪月影漲幽香碧玉釵頭白玉粧持似此花供燕几

玉堂端可壽萱堂

和程閣學送小春茶韻四首

眼看節物去重來又見寒梢數點梅草木已隨新歲好
冬芽豫占一年魁

物物呈祥豈偶然新芽新味更新年靈苗却解為人壽
請為君謨續此篇

七椀由來厭八珍猶堪代酒亦生春箇中風味須知趣
慙愧劉公獨倚新

家山歷歷未歸來
投老江湖祇自咍
賴有年年鄉信好
一甌浮玉飽春臺

和子長見招韻四首

攻擊愁城從事裏
消磨日月手談中
不緣我輩真風味
安得尊前笑語同

青林綠幄春歸後
翠岫蒼崖雨過初
作意尋幽還得笑
隨宜供客莫求餘

清游已恨期年別
勝處能消一日情
莫對浮山無好語

相逢草木有佳聲

飛香雨過雙溪閣舞翠荷開十丈花佳處正須供一賞
相從吾亦豈匏瓜

招山陽高徐二生飲二首

梅花時節屢開樽欲贈梅花欠可人今日有人梅樣好
逢君同賞雪中春

欲作山陰興盡回良思與子把離杯要須人境俱清絕
好抱瑤琴踏雪來

到房山交代招飲四首

躡盡巉巖氣未蘇
悔來坡下獨長吁
一觀烟霧南山面
從昔名坡信厚誣

簷外浮嵐暝翠堆
道人清眼為渠開
飡錢官薄何須計
直為南山亦合來

勝日山堂共一樽
未妨窈窕對嶙峋
髻分翠影眉爭綠
人與南山各可人

妓圍簷額潤空青
岫幌雲關夜不扃
吏隱風流輸我輩

不須逋客詫山靈

再次韻四首

山好能令肺病蘇詩來把玩更驚吁蜀人例作殘山看
端喜因詩免受誣

語不能工恨作堆撚髭空對翠屏開清吟賴有雕龍手
繡段聯翩詔後來

犖确悍頑經數驛醒然初挹碧嶙峋眼明驟與真山晤
不比逃虛見似人

山色陰晴遠更青誰教睥睨枕巖扃詩翁意欲移千步
安得朱符祝巨靈

再次交代韻四首

筆力潛窺大小蘇詩傳諸老定戲吁從今訂價連城重
政使羣兒有善誣

昔夸石廩祝融堆驟見人家畫軸開坐挹高寒吾願足
此行似為此山來

環秀亭中命淥樽雲烟明滅映嶙峋佐州不喜分風月

喜與南山作主人

詩人妙思天同巧
鬼守玄關不及扃
間挹山光誦竒語
斷無塵滓溷襟靈

再次交代韻四首

嗣皇仁覆物
昭蘇臯自陳
謨繇自吁聞
道諸公扶國論
須君左袒訂
邪誣

今朝著我簿書堆
領客樽壘未辦開
始信南山是知己
露竒呈秀斬關來

漫叟當年白作樽，
樽青嶂漫嶙峋。
與君屢共山前醉，
似覺清歡勝昔人。

傳聞洞府鎖高深，
探著詩成數啟扃。
想見羣僊書玉葉，
更應交口歎精靈。

再次韻四首

君家詩價自姑蘇，
系胃蟬聯世喁吁。
欲把阿元輕輩行，

古今俗子喜相誣。

世稱韋郎葛立方謂士元非
韋比立說甚嚴見韻語陽秋

眼底薔薇玉雪堆，
過從休待牡丹開。
送春踈酒山應笑，

底用奚囊日往來

是日同
小酌

視草行看賜上樽
濁醪付我酌
嶙峋扶攜誰共山前醉
從此無君度外人

詩愁磨盡鬢邊青
玄鑰無施閉理扃
牛渚錦官祠廟古
瓣香儻格在天靈

復次韻四首

諸李辭章推李白
向來蜀道賦噫吁
房陵山險猶如許
石穴巴邛定不誣

昔上瞿塘濫瀕堆盤渦如井放舡開山行歡喜今非錯

地有錯
歡喜山

備見捎瀆擊漩來

十里髻鬟誰綰結半天蒼翠自嶙峋教兒莫憚依山住

閱領裁衣盡土人

病肺還沾竹葉青

房酒
頗佳

小園春去尚深扃春衫紅藥強

相比婢子可憐無性靈

夜飲朱國寶家

又見僊潭二月春一番官柳市橋新重來莫訝星星髮

樽酒相看只故人

二十日新田清江一曲小飲

一曲清江古岸頭
茅簷初日照高秋
數聲又得閒身到
相對綠漪橫小舟

晦日昌甫見過因約伯臯小飲黃守繼至三首
滿簷風動海棠雨
北客江南詩酒中華
髮尊前無好句
飛花常望夕陽紅

章泉泉水在玉山
有客歲時來往間
今古風烟只如此

見君生怕又言還

靖州太守詩自佳留連濁酒看殘花澗上久矣無此樂
落拓尤憐雲月家

飲歸

醉飲寒窓慣擊鮮扶頭岌岌似乘船廣酬磊落成佳致
糠粃誰令輒在前

謝王提幹召飲三首

既往則妓車
集一盃徑歸

坐上紅衣未放歌客間冷面醕金荷驚飛可待聞檀板

擬奈吾家故事何

賓筵笑語雜絲絃說到山翁更粲然
衰鬢豈應粧面側
陳編只合粉袍前

不慣香風擁妓車分當清坐冷官衙
歸來自笑殺風景
却把茶甌對菊花

學宮諸生飲邀予與子野同之二首

同筵儒宮把一觴鹿鳴伐木奏深堂
要防技癢論文地
莫憶前宵放酒狂

少日峨冠英俊塲課餘觴飲共徜徉孰知薄宦江湖去
頻夢爐亭餅飀香

求酒於鄰

太息官寒獨養疴浮生半作病維摩新涼欲學東城醉
亡奈維壘已恥何

求酒於周時仲教授

寒窓矻矻數更聲燈火無多獨自親忽報周郎好消息
明朝應遣白衣人

謝曹宗臣惠詩酒二首

公今自是客中身更為閒人念客情料得酒腸終易放
一樽相寄拓愁城

方冊相看四十年客中尋得舊蠻緣與君一夜清談約
已覺羈懷寢不然

和同年張季良少卿餽家釀韻三首

六十衰頽愧鬢蓬黃花更負一年中白衣誰薦紅萸酒
吸盡殘荷碧玉筒

與君昔日賦斜陽綺語曾窺萬丈光節物撩人人更老
籬邊猶是去年黃

拭目高吟陋戴盆續貂何敢曳詩門百壺蕩漿惟公爾
此外應無說尹村

謝魏南伯饋假河魴羹

江南風物與君論蘆笋蘭蒿薦晚樽舉酒不知身在遠
隔江誰送假河魴

先遺二子魚於子長踰旬而子長以四子魚來

詩來愧我秣糠前四尾堆盤勝酒船席上已無彈缺恨
感恩何止二贏錢

泊吳江食蓴鱸菰菜二首

青絲簇飮蓴羹味白雪堆盤縷鱸我向松江飮鮮美
菜腸今更食新菰

一舸清風四牡還垂虹亭上幾欄干季鷹命駕勞千里
如我清遊却不難

庖人舟殿後餒甚以葱虀佐飯

黃州狹港半江空白飯青葱酒一鍾莫厭路貧愁欲絕
稍還甕牖舊家風

謝侃老送苦筍

籜老泥黃千仞種箇中風味亦佳哉誤人政為甘言誘
愛我徒渠苦口來

謝侃老惠蜜

釀花流蜜傍虛簷乞我分甘要屬饜剛被平生飽辛苦
自憐嚼蠟不知甜

詠墨

奚李名高三百秋只今良法信源流
裕陵獨寶君家物猶帶祥光燦斗牛

瑞孫周歲

頭顱七十已看看喜抱孫來傍
醉盤敢望吾家有英物箕裘且欲戀儒冠

題邵氏集瑞圖

詩歌名伯意懷哉愛及甘棠
勿剪推自是慶源鍾草木

故將多瑞秀雲來

題江月圖

勝愛江邊月滿衣雲高天闊數星稀
如今解組浮家去
準擬扁舟滿載歸

題惠老所藏歲寒圖

寒梢獨挺昂霄意蒼蓋猶矜傲雪顏
盤膝倦吟無一事
老僧心與白雲間

水斛圖

游魚豈解知人意孝子精誠一念深樂事世間如此少
我懷風木只傷心

題信相寺黃筌畫花竹

生成造化奪工夫盡入黃家幾畫圖可惜春來誤遊子
攀花不落有還無

題牧隱二首

年來厭索長安米老去猶居大隱廬豈是紅塵故相挽
枉令空愧牧牛篇

鐘鼎山林志則均未須牧隱卧漳濱要令天下歸吾牧
莫為牛羊遽絕人

題寄顏畫士姜元愷

丹青以意不以色人不論形當論心我有平生方寸地
煩君更向筆端尋

臨安邸中即事且謝誠齋惠詩十二首

猶得千篇慰旅思坐吟行咏只相隨豈無一箇閒賓客
便有誰來得似詩

東風一夜轉西南分外羈愁分外寒
秋裏酒腸渾不放
一盃全似十盃寬

老來無復夢清都到得清都却守株
此子行期猶自拙
箇中能巧定應無

一去重來髮已星八年歸老卧漳濱
似曾相識滿天下
不信憐渠未有人

悶殺樓居隘似囚一樓四壁障雙眸
趁晴下得樓來看
又被西風趕上樓

有愁無睡照燈青
鼠齧蟲吟到五更
不分小黥同作祟
呼牌也作百般聲

世事全無只恁閒
光陰間裏故相關
欲將睡去消磨日
睡得醒時日未闌

只作離家一月程
如今一月正飄零
定非官祿星臨命
想見流年是客星

急雨斜風一夜狂
客衾愁枕五更長
問君箇裏情懷惡
不聽鶉啼也斷腸

挑燈拭眼聚詩材
撚斷鬚時句欲裁
判却三更猶不寐
待渠明月過樓來

萬瓦叢中客裏身
可憐虛度一番春
日長尋得寬心術
喚取門前賣卜人

男兒孤矢四方居
何以家為莫念渠
打撲精神希一遇
書來不必問何如

題端上人詩卷

般若經中正續燈
可憐白足赤髭人
頭陀臨水曾觀影

應識圓光寶蓋身

萬元亨名所居為景馬堂於其家求書記額

公居雖未稱潭潭占盡湖山直到南覓我新題留琬琰
少游高處要同諧

泊金山觀虞仲房書雲峯扁榜

平生筆法蔡中郎到處標名憶仲房一涕無從人不見
雲峯亭下水茫茫

題汪伯時家藏顏魯公書裴將軍帖

詩成小見英雄手筆落能令風雨驚萬古言言有餘烈
從今詞翰豈虛名

跋蘇文忠公帖

世言晚食同於肉緩步猶云可當車三復文忠二三帖
古人深意在徐徐

題山谷居士書坡公帖

當年二老歎云云猶喜坡翁返故鄉展卷如今但陳迹
丘原無復起蘇黃

跋馮文簡公贈朱忠靖公帖四首

三魁天下極登庸具眼相看識巨公翰墨密傳心印子
勲名同在百年中

人間事了乞身歸想見蕭然閉戶時鐘鼎山林元不二
惟公全德兩無虧

傳家二帖到今存歲月君看上相言大似涪翁推酉日
永平七襪記鹽盤

忠靖由來世不殊昔年我亦見今暮至今猶有家風在

却恨丘原起日無

題胡待制平賊帖

誤國何人作計疎
滿朝元未識真儒
至今恨却無頗牧
不念丘原起日無

題徐氏子所藏四賢帖

十年尋夢舊江湖
歲晚尋幽愛此居
今日門前山色好
客來銜袖有文書

題徐氏手帖二首

不作朝家青紫綈笑看金鼎識刀圭右軍六帖家藏在
乞與安西手自題

我昔曾窺玉海書畫圖今見澤僊癯為君持似人間世
凜凜猶堪立懦夫

將至慎邑寄鼎

踏盡瓊瑤百里山欲投城郭暮雲間紅爐速置一壺酒
故歲誰家新歲還

葉信父家聽琵琶

娉婷未嫁惜琵琶借與詩人著意誇不數前人推引曲
只矜趙女綺羅花

觀鹽井二首

桔槔汲水三千丈頃轉輸餘一日回棖笠傍城埋井底
皮囊挈出滴泉來

私井公鹽日夜煎力勞功寡廢民田不如大噫驅東海
捲取洪波向蜀川

和程泰之閣學詠雪十二題

僵卧誰憐此意真
開門羞見玉為塵
休穿東郭先生履
要踏蜂窠滿地銀

右看雪

春芽初趁六花光
嫩火新烹喚客嘗
政藉瓊漿浮點乳
浪云勝雪詫餘香

右煮雪

相看景物又年華
浙浙投窓意轉嘉
冷落不堪春信晚
稍留六出待梅花

右留雪

陽春有脚時難駐見
覘初消意已先我亦鬢蓬飛雪滿
與君相遇約年年

右餞雪

凜節清姿老更堅
不須藏雪待炎天
明年歸拜頌冰寵
吉甫清風在舜絃

右藏雪

一別瑤池輒去思
明年農事要先知
天風夜半播旂動

便欲欺梅更壓枝

右招雪

灑窓猶作故人來
聲到樓頭畫角猜
聞罷更須憑目力
箇中時欲認真梅

右聞雪

飲冰受命元非僻
齧雪充饑豈是狂
何似催班僂仗裏
一堂均宴近臣觴

右飲雪

庭柯風動還篩玉稍稍柔條醉欲持剛道瓊瑤未輕掃
晚鴉棲處已搖枝

右打雪

浪走嬌兒意却癡長安餓客最憂時尤憐甲士寒侵骨
十萬邊兵政有辭


右嘲雪

天與騷人景物宜風流嘲戲恰相知長安道上吟詩罷
笑裏騎驢緩勒羈

右弄雪

一庭冰柱初融濕滿陣飛沙又壓蒼奪得瓊花消息早
揚州十里上珠簾

右挂雪



東塘集卷六